

正北正北否

統

統

征

臨

使泰

北

事

戎

狩

事

蹟

蹟

錄

錄

錄

錄

錄

錄

錄

錄

錄

錄

錄

錄







錄 泰 否

著 之 定 劉

編主五雲王

編初成集書叢

種四他其及錄泰否

中華民國二十六年十二月初版

發行人

王長沙南正路  
雲五

印刷所

商務印書館

發行所

商務印書館  
各埠

紀錄彙編卷之十六

否泰錄

劉定之

昔我太祖高皇帝膺受天命驅逐胡元遯歸朔漠其末帝妥懽帖木兒旣殂太祖以其嘗君臨華夏也謚爲順帝可謂盛德至仁矣順之遺胤據其故穴仍君長其醜類世數莫考惟知其地名瓦剌其君立於宣宗皇帝時者名普花此稱爲可汗而彼自稱不可知計必仍僭其先世大號也故其臣亦悉用故時將相稱號豈非羊質虎皮鷲翰鳳鳴者哉稱丞

相者二人一曰和寧王阿魯台一曰順寧王脫懽常遣使朝貢 朝廷賜以詔書亦稱之曰王其後二人相繼死而脫懽之子曰也先悉有二人部屬其號爲太師君臣異處常不相見普花娶也先妹以相固結今 皇帝卽位以來也先每年冬遣人貢馬 朝廷厚答金帛過元旦郊祀始去然久之漸桀驁不恭往來通使等變詐翻覆告以中國虛實也先求以其子結媼於 帝室通使皆私許也先進馬爲聘儀 朝廷不知也答詔無許姻意也先愧怒以正統十四年七月初八日入寇塞外城堡多陷沒邊報日至遣駙

馬都尉井源等四將各率兵萬人出禦之源等旣行  
司禮監太監王振復勸 上親征命太師英國公張  
輔太保成國公朱勇等治兵朝臣奏疏請留不允十  
七日 駕行 命郕王居守每旦於闕左門西面受  
羣臣謁見朝政皆太監金英吏部尚書王直學士高  
穀駙馬焦敬等共議其從駕行者尚書王佐鄜塾學  
士曹鼐等官軍私屬共五十餘萬人出居庸關抵宣  
府井源敗報踵至 上至大同驀有黑雲如傘罩營  
雷電如雨王振惡之乃以 駕還八月十三日至狼  
山虜追及遣朱勇等三萬騎逆戰皆敗死無隻騎回

是日 駕至土木日尚未晡去懷來城僅二十里欲  
入保懷來城振輜重千餘輛在後未至留待之遂駐  
土木旁無水泉又當虜衝十四日欲行虜已逼不敢  
動兵士束手饑渴十五日虜使持書來以求和爲言  
召曹鼐草勅與和遣二通事與虜使偕去遂移營踰  
塹以行迴旋之間行列已亂爭先奔迸勢莫能止虜  
騎蹂陣而入奮長矛以擊我軍大呼解甲投刃者不  
殺衆裸袒相蹈藉死蔽野塞川虜叢入中軍宦侍虎  
賁矢被體如蝟 上與親兵乘馬突圍不得出虜擁  
以去文武軍吏幸免者蓬首赤身踰山谷連日饑餓



得達關虜舉我輜重惟取金銀珠寶貴細者其實虜  
衆僅二萬我師死傷過半矣十六日 上在虜營手  
書遣使與懷來守將言被留且索金帛懷來城閉不  
可入縋而登復遣人送至 京師以其夜三鼓從西  
長安門入報十七日百官集 闕下頗聞敗報私相  
告語愁嘆驚懼出至紫陌見軍士奔歸瘡殘被體血  
汗狼藉然尚未知 上所在也是日午遣使齎黃金  
珠玉衮龍段疋等物馱以八馬詣也先營請還 車  
駕十八日 皇太后召百官入集 闕下 命郕王  
權總萬幾於午門南面見百官始啓事奉令旨施行

衆皆謂行且卽真矣數日內外洶洶不自保已而

皇太后詔天下立 皇子見深爲 皇太子又數日

尚書于謙等彈奏奸臣王振傾危 宗社歷數其罪

千言讀旣畢 王諭以自有處置謙等言振罪惡滔

天今日不正典刑滅其族臣等皆死于此不但已也

因痛哭聲徹中外 王起入內中使將闔門衆擁謙

等隨入太監金英傳 令旨且退衆奮欲粹英英懼

言令藉沒振遣指揮馬順往衆曰順奸臣黨也宜遣

都御史陳鎰英脫身入順前勸解辭色稍遽給事中

王竑粹順首衆爭毆之蹙踏捨裂頃刻而斃或就脫

順靴擊出其眼血流門闕衆皆愈怒求內使王毛等  
二人英使人摔出亦擊殺之曳三屍陳于東長安門  
軍士猶爭擊不已陳鎰奉 令旨率軍藉振宅并其

黨彭得清內使陳管家等項之執振姪錦衣衛指  
揮王山至跪于庭共唾罵之乃宣 令旨獎諭百

官各歸蒞事拜謝而出明旦移 邸王坐于奉 天

門左受朝由此卽真之議益急振宅在宮城內外凡  
數處皆重簷邃閣僭擬 宸居器服綺麗尚方不逮  
玉盤徑尺者十面珊瑚樹高六七尺者五七株金銀  
十餘庫馬數萬匹鬻王山于市其族無少長皆斬山

弟林亦爲錦衣衛指揮從振死于虜林兇悍尤甚姬妾百數二十二日虜擁 上至大同城門閉校尉袁

彬隨侍以頭觸門大叫於是廣寧伯劉安給事中孫祥知府霍瑄出見獻蟒龍袍 上以賜知院伯顏帖

木兒及也先弟大同王賽刊王 上曰秋稼未收軍

士久饑可令刈以入城又曰虜欲歸我情僞難測宜

嚴爲備安等獻酒 上酌地飲訖虜令括城中犒

軍物

并內官郭敬等金銀共二萬餘兩來迎 駕旣獻虜

咲不應二十三日 上索西瓜雪梨割與虜食訖遂

去過貓兒莊九十九海子又行見蘇武廟李陵碑二

十八日至黑松林也先營在焉 上入營坐也先拜稽首乃侍坐宰馬設宴出其妻妾四人以次奉 上酒歌舞以爲娛其後遂奉 上居于伯顏帖木兒營去也先營十餘里伯顏帖木兒與其妻見 上亦如也先禮伯顏帖木兒每二日獻羊七日獻牛也先每七日獻馬二人者每出獵則又以其所獲野馬黃羊之類來獻二十九日 皇太后命郕王早正大位以安天下有司擇日行禮衆遂相率詣文華殿門請王出見 王辭讓不允衆共言 祖宗神器不可虛聖母有命不可違有旨從請乃再拜山呼而出九

月初也先遣其酋長尚書來言欲送 上還京入見

賜以冠帶綵段臨行以金百兩銀二百兩綵段若干

疋賜也先初六日 王卽皇帝位遙尊 上爲太上

皇大赦天下百官六軍賞賜有差後數日也先復遣

使至書詞悖慢 朝廷復書大畧言中國已立 皇

帝天下兵甲衆盛可相抗禦之意已而命羅通孫祥

爲副都御史守居庸紫荆關石亨爲武清伯總攝京

師兵馬十月初也先入寇自紫荆關入殺指揮韓清

等孫祥走死初九日虜至京師城西北關外石亨營

于城北兵部尚書于謙督其軍都督孫堂營于城西

刑部侍郎江淵叅其軍交趾舊將王通爲都督鴻臚  
寺卿楊善爲副都御史守城虜攻城連日抄掠亨等  
與之殺傷相當其酋長鐵元帥死焉時畿內降附胡  
人留居者多乘時爲寇 朝廷重賞購捕被獲者累  
日不絕虜稍沮復遣使言欲和十七日以通政司叅  
議王福爲禮部侍郎中書舍人趙榮爲鴻臚寺卿持  
羊酒往也先營也先與其弟及伯顏帖木兒擐甲胄  
厲弓矢 太上帶刀引福等前露刃夾之福等拜訖  
也先揮却羊酒取 勅視番字 太上取勅視漢字  
也先謂福等尔小官可令胡浚于謙王直掘善等來

福辭歸時四方兵漸集虜夜遁從居庸關出遺所掠牛羊人口于路以緩追兵 太上自紫荆關出乘馬踏雪而行遇險則袁彬執鞚旣入虜境也先來見宰馬拔刀割肉燎以進云勿憂終當送還食訖辭去十九日瓦刺可汗普花遣使獻馬先是普花駐兵關外未入至是以尋舊約通和爲言 朝廷以其來緩師却之胡濙王直言普花也先君臣素不睦宜受其獻以間之從濙等言亦使人入見獻馬八匹賜衣服冠帶酒饌金帛視常年有加二十二日遣楊洪孫堂范廣等率兵二萬擊虜之未去者二十五日破虜於固



安得牛馬驢數百匹奪還人口萬餘十一月初八日  
以虜旣退 京師解嚴降 詔撫安天下十一日免  
朝百官望拜 太上聖節于朝天宮十三日楊洪等  
旋師入見言虜衆已盡絕其實不過百餘散掠各郡  
驅人畜以自擁衛望之若數萬衆官軍不敢逼其南  
去者各郡以漸捕獲之其北去者洪等逐至關殲焉  
猶殺官軍數百人洪子俊幾爲所殺旣奏捷以洪爲  
昌平侯與副都御史羅通練兵于東教場石亨練兵  
于西教場二十三日也先遣使來索大臣迎 駕約  
以後月初三日至其營否且又入寇書詞甚慢不答

二十九日冬至免朝賀每年是日遣官祭長陵 孝  
陵 景陵至是以胡寇近在山外陵旁宮宇祭器皆  
被焚掠守陵官軍死亡逃竄暫輟祭禮十二月初二  
日贈太師英國公張輔爲定興王學士曹鼎爲少傅  
吏部尚書文淵閣大學士皆死于土木者也初四日  
尊 皇太后爲 上聖皇太后初七日尊 母吳氏  
爲 皇太后初八日立 妃汪氏爲 皇后冊 太  
上官嬪周氏爲貴妃卽 皇太子所生母也初十日  
詔告天下赦在京流以下罪囚景泰元年庚午正月  
初一日受朝免賀初七日 太上書至索大臣來迎

命公卿集議推舉舊任老成當行者初十日大祭

天地于南郊慶成賀宴如常年十八日遣都督范廣  
等率兵巡居庸等關以虜入遼東寧夏皆有報至也  
二十九日遣都督等官石彪等率兵巡懷來宣府等  
城閏正月初十日諜報虜掠西郵取慶陽府所牧駝  
馬牛羊以去二十六日大同奏虜至城下總兵官郭  
登敗之陞登定襄伯二月初一日大同奏敗虜于黃  
土嶺獲首級二十三顆馬驢一百二十三匹頭奪還  
男婦二百二十五名口器械衣服稱是指揮使許貴  
之功也十四日宣府叅將楊俊執喜寧喜寧內侍從

太上于虜中者數導虜入寇 上患之太上亦以

虜入寇不已則和不可必不和則還京未有期也惡

寧寧又忌袁彬嘗誘彬出營將殺之 太上覺其詐

急召彬回乃得免及是彬言于 太上遣寧傳命于

俊索春衣因遣軍士高磐與俱彬刻木藏書繫磐髀

間以示俊俾因其來執之俊既得書與寧飲城下磐

抱寧大呼俊從兵遂縛寧至京師處以極刑於是虜

失其向導亦厭兵矣十六日以石亨爲征虜大將軍

率步騎三萬五千人出紫荆關以巡北邊其後虜涉

春及夏不復大入六月二十六日也先以屢遣使議

和不成俾其知樞密院阿刺爲書遣其叅政完者脫  
懽等來 上疑其詐召文武羣臣議以爲虜交兵旣

久士馬疲怨又失常年和好之利度其情出于誠且  
太上在虜理宜迎復虜縱以詐我當推誠 上聞

允奏遣禮部侍郎李實大理寺少卿羅綺指揮馬顯  
與脫懽等以七月初一日行十一日至也先營所失  
八兒禿之地也先曰兵端皆因通使陳友等小人締  
構以致小事成大及我送 太上還京不遣大臣來  
議又殺所遣使臣張關保等我向北後遣者盈不花  
等亦不生還其故何也實等答曰太師雖名送 駕

兵行不戢攻關掠野 朝廷豈信張關保等死于陣者盈不花等未至京皆因將士不以爲來和而以爲來戰故也也先曰喜寧是 朝廷內臣我所遣來何爲亦見殺實等答曰喜寧蒙 太上厚恩却乃導引太師兵馬殺之宜矣也先曰 太上在此我令伯顏帖木兒早晚恭敬未嘗失禮因以酒酪飲實等十二日遣人引實等至伯顏帖木兒營見 太上實等拜泣問起居 太上曰朕非以畋遊而出實爲生靈除害然陷于此者王振所致也及也先實意送朕回又被喜寧屢次阻住但唆令進兵今王振喜寧皆死矣

因問 上聖太后與 上安好又問舊臣數人又曰  
在此踰姘見卿等曾將衣服靴帽等來乎實等曰虜  
中屢有人走回皆不知 車駕所在 朝廷遣使亦  
無回報以此臣等行時諸物未帶時御用物惟金龍  
繡枕在實等因自出所有食器燒酒焙肉等爲獻復  
欲盡取所齋米來獻 太上曰小事勿勞卿等爲朕  
通和乃大事李實等因極言王振曩昔擅國致寇之  
罪 太上曰振未敗時無人肯言朕亦不能燭奸悔  
恨何及語將畢伯顏帖木兒至 太上賜酒共飲伯  
顏帖木兒復邀實等至其帳相與飲實等回至 太

上帳內求留宿館伴者不肯實等乃至也先營宿十  
三日也先置酒以飲實等也先曰尔等念 太上否  
實等曰君父蒙塵臣子豈不念乎也先曰尔等旣念  
何不迎回實等言來迎之意也先將從之伯顏帖木兒  
言禮物未備不可容易也先乃止凡實等所與也先  
及伯顏帖木兒語者其妻皆並坐共議傳酒相酌也  
先伯顏帖木兒貂裘胡帽其妻珠緋覆面垂肩盃酪  
孟肉粗塊長啜亦更互吹彈歌舞以爲樂十四日也  
先遣其右丞相把禿同實還貢貂皮馬匹遣其尚書  
土兒罕以羅綺往大同調回虜兵不復擾邊實辭



太上袖出書三通以授質其一奉 上聖皇太后其

一達于 上其一諭羣臣伯顏帖木兒約實速來成

和好且指也先幼子曰此與 朝廷議媾者也實不

敢對十九日實至懷來遇右都御史楊善侍郎趙榮

同可汗普花所遣使皮兒馬黑麻比去蓋瓦刺國政皆

也先專之其兵最多普花雖爲可汗兵稍少知院阿

刺兵又少君臣鼎足而立外親內忌其合兵南侵利

多歸也先而弊則均受及欲和則也先耻屈意而陰

使普花阿刺所遣脫懽旣與實等行普花所遣黑麻

等復要善等出惟慮和之不早成也實等旣至 京

緣邊虜兵皆退二十九日善等至也先營也先方出獵八月初二日回營與善等相見 太上遣袁彬來會彬臥起長不離 御帳夜甚寒則以身爲 太上温足彬嘗病 太上親壓彬肩背取粥啖之以出汗至是從旁促善等使盡言也先遂許送 太上還京平章昂克曰既是送還有何禮物善等曰太師敬我君父故送還豈先論財乎 朝廷臣子蒙太師盛德豈有不報也先曰昂克說不合理我圖垂名後世爾衆酋聞善語皆以口咬其指曰好漢好漢初三日善等見 太上于伯顏帖木兒營初四日也先請 太

上至其營餞行也先彈琵琶其妻奉酒善等待飲執  
臣禮甚恭也先嘆曰中國好禮數宴畢也先送出帳  
十數步 太上登馬乃退蓋 太上在虜營踰年未  
嘗屈尊也先間見必致敬曰我人臣也可與 天子  
抗禮哉嘗欲以其妹事 太上不從乃止以此深服  
聖德虜人往來窺覘 天容穆然殊無慘沮惟問  
實等言 聖母安好乃泫然出淚飲食所餘多以賜  
中國被虜者及其將歸莫不悲戀虜人亦不忍別連  
日各設筵餞行初八日 太上駕行伯顏帖木兒護  
送十一日駐蹕野狐嶺伯顏帖木兒等數百騎皆慟

哭良久既別去昂克於中路射麇獲之馳十數里來  
獻十三日駐宣府十四日駐懷來十五日駐唐家嶺  
上遣內閣學士許斌商輅至 太上命書誥諭避  
位免羣臣迎十六日自東安門入 上迎拜 太上

答拜拜畢相抱持而哭各述授受之意推遜良久乃  
送至南內羣臣就見而退大赦天下有生咸欣欣焉

臣竊謂 聖朝承平既久釁孽潛滋內有奸臣播弄

外有騎虜憑陵故已巳中秋之變亘古所無然尚賴  
天心默祐 皇基鞏固振威以遏其侮厚德以化  
其順故庚午中秋之慶亦亘古所無幹旋乾坤並明

日月用夏變夷撥亂反正何其神速也哉臣因所目擊耳聞叅以楊善李實所述奉使錄錢溥所撰袁彬傳約其繁蕪著爲此錄蓋出征之月否卦用事之月也回鑾之年景泰紀元之年也先之以否繼之以泰雖則運世關乎天數矣名之曰否泰錄自以身備史臣於國家大務不敢不具載以備遺忘故也雖然聖神相繼于億萬年撫念前事豈不增感於制治保邦之良圖也哉

廣信府同知鄒 潘

推官方 重校正

臨江府推官袁長馭校正

上饒縣學教諭余學申對讀

湖州府後學吳仕旦覆訂



北使錄

李實撰

北使錄

本館據紀錄彙編  
本影印初編各叢  
書僅有此本



紀錄彙編卷之十七

北使錄

李實

正統己巳瓦剌不花王及太師也先背逆天道侵臨  
邊陲聲息日至時太監王振竊弄國柄請 上出征  
迤北吏部尚書王直及大小羣臣極諫不從是秋七  
月十六日 上躬率六軍起行往往征虜罪直至大同  
命平鄉伯領軍與虜出戰敗績回至宣府八月十三  
日過鷄鳴山遇寇命成國公朱勇出戰亦敗績十五  
日至土木也先人馬四圍大戰大軍倒戈自相蹂踐

虜寇大肆殺戮邀留 上駕十六日遣報飛至奔潰

回京者皆殘傷裸體京師恐怖 太后命上監國立

皇太子詔告天下九月初六日 今上卽皇帝位

上 太上皇帝尊號景泰庚午六月二十六日戊戌

瓦刺知院叅政完者脫懽五人齎番文表至請和

上御文華殿文武大臣懇請差人往虜中議和奉迎

太上皇帝己亥郊時 上命太監興安傳 旨要

於大臣中務要選如宋富弼文天祥者遣之二十八

日庚子禮部三品已上官具名封進點差時實任禮

科給事中 上命興安召實問其鄉貫傳 旨曰恁

累進章朝廷素知忠節正欲遣使往虜中如何實曰  
某雖才識不周適朝廷多事之秋安敢辭興安曰諒  
爾不辱君命 聖旨李實陞兵部右侍郎做正使羅  
綺陞右少卿做副使馬顯陞指揮做通使便寫勅旨  
與他每去欽此本日進本討馬匹等物本上 欽改  
禮部右侍郎三十日欽給帳房馬匹酒脯等物初一  
日早辭 上御左順門召實等面諭曰尔每去脫脫  
不花王也先那裏勤謹辦事好生說話不要弱了國  
勢賞銀三十兩并衣服一套綵段三表裏領齋達達  
可汗也先太師瓦剌知院勅書三道及各人銀三百

兩絲段二十四表裏本日同虜使參政完者及侍郎人等共二十一人起行宿榆河驛 上命光祿寺設

酒初二日居庸關給價鈔辦酒席館待使臣初三日宿懷來衛仍辦酒席館待初四日離懷來賦詩云曉出懷來往北行西風寒颭馬蹄輕虜營迎復吾

皇駕會見人民亨太平本日過長嶺賦詩云 盤旋

直上長安嶺徧覽驅馳路轉賒遙憶 上皇經過日

幾番回首望京華過鵬窩堡十里乏馬一匹宿荒初五日天曉忽有達賊二十餘人各張弓弩一人仗劍衝入帳邊完者脫懼急與答話詢知可汗所差尚書

阿魯述等先送先使臣平章皮兒馬黑麻赴京奏事  
在彼等候阿魯述等下馬作禮復送三十里別賦詩  
云 胡騎長驅入帳來張弓仗劍怒如雷譯知兩國  
通和好長咲一聲作禮回同日過雲州夜直雨赤城  
溫泉口四十里宿荒被賊盜去馬三四匹初六日過  
獨石衛遇也先人馬驅車運糧有感賦詩云 道經  
獨石停征騎世事皆非實可傷守將肆貪營宅地近  
臣徒力保邊疆人家已盡遭兵火倉廩猶存助敵糧  
回首具封希 上旨用懲有罪表忠良相離城北五  
里宿荒虜人喜悅歌唱歡飲乳酪其夜被盜去馬六

匹初七日過羶帽山二十里宿荒述懷一詩云 萬  
里宿荒傷遠遊風寒露冷正高秋山行野宿渾忘險  
腥飲羶食肯解愁駝馬連營輸饋餉犬羊夾道喜歌  
謳虜酋悔過重朝貢早奉 鑿輿復帝州初八日宿  
興和衛東珂邊初九日宿昂棍岡兒卽海子初十日  
宿失刺失簿秃卽也先邊塞營中送下程羊二隻十  
一日至也先營中地名失八兒秃與也先保伊婦相  
見開讀勅書畢也先曰大明皇帝因何差爾每來實  
答曰自太師父祖以來至於今日朝貢朝廷三十餘  
年你使臣進馬往往待以厚禮遇以重恩近因奸臣

王振專權減少馬價以故勒兵拘留 太上皇帝聖  
駕搶掠人民殺害軍馬今瓦剌知院上合 天道下  
順人心奏知可汗稟過太師特念前好同差叅政完者  
晚懼齋文赴京以求和好依舊遣使往來也先日這  
事只因陳友馬清馬雲小人上是非所以動了軍馬小  
事兒做成大事我的實心送 太上皇帝到京你每  
不差大臣出城迎接我又着張關保姚謙去奏又將  
他來殺了實答曰太師說是送駕軍馬不由關入漫  
山而來肆意搶掠不過假名送 駕我 朝廷不能  
無疑况又分兵各門廝殺姚謙張關保既爲使臣却

引達達百餘人各張弓矢遇敵亂殺實不知二人爲使臣也先曰說得是又曰後又差者盈不花夫人赴京奏事何故不放回因止捨了寧夏大同一帶人馬實答曰先因太師人馬南侵父被受害者子爲報讐兄被虜者弟亦報讐人皆樂爲從軍今南朝沿邊關口軍馬多者十餘萬少者六七萬極少者二三萬俱各奮勇欲報君父之讐且軍獲一首級卽將陞賞太師差使臣若無南使同行或被兀良哈達子或守邊官軍殺戮以圖陞賞又曰後又差李實我着人送至太同城裏因何亦不肯放回實答曰近得夜不收報說



哨至大同東邊離城八十里見在殺死身屍四十餘人拾得荷包一箇內有文書一紙言是太師差來奏事人既不存未審虛實想被守邊軍士并別處賊人殺了並不見一人到 朝廷如叅政完者晚權等到京奏事重加賞賜禮待筵宴又差我每來同兩國和好必資使臣以通其情豈敢殺害自絕其路也先然之又曰我又差喜寧奏事何以殺之實答曰喜寧自幼至長受 累朝聖眷厚恩托爲心腹令齎金帛迎取 上皇却令太師人馬搶掠復寇寧夏朝廷已將喜寧明正典刑凌遲三日以爲將來不忠之戒也先

喜其言曰我亦知道又曰大明皇帝與我是大讐  
自領軍馬與我廝殺天的氣候落在我手裏衆人勸  
我射他我再三不肯他是一朝人主特着知院伯顏  
帖木兒吾早晚恭敬不敢怠慢你每捉住我時留得  
到今日麼明日着人引你每去見實答曰足見太師  
仁厚之心也先曰你每來得好我正歡喜料你每事  
務成就若不來呵我每八月十五日上馬到北京也  
先把酒曰路上辛苦可勸飲數盃畢出令平章尚書  
人等送壯馬一匹宰爲下程十二日差頭目人等齋  
達達可汗并瓦剌知院勅書賞賜分頭前去同日差

平章人等引實等去三十里朝見 上皇同少卿羅  
綺指揮馬顯共進紵絲四疋及粳米魚肉楸杪燒酒  
器皿等物實泣下行禮畢惟見校尉袁彬餘丁劉浦  
兒僧人夏福等三人侍左右 上所居者圍帳布幃  
席地而寢牛車一輛馬一匹以爲移營之具 上曰  
比先我出來非爲遊獵私已之事乃爲天下生靈躬  
率六軍征討迤比不意被留在此實因王振陳友馬  
清馬雲所陷也先實意送我回京被喜寧引路先破  
紫荆關搶殺人民擁至京師喜寧不肯送回後至小  
黃河也先欲送回又被喜寧阻住在 乾又要送回

又被他阻當喜寧既凌遲了陳友等不要饒他 上  
問 聖母及 今上安否實奏曰安及問舊臣一一  
道其姓名甚悉 上曰我在此一年因何不差人來  
迎我回你每與我將得衣帽來否實奏曰 陛下蒙  
塵大小羣臣及天下生民如失考妣但虜中數次走  
回人口有言見 陛下者有言未見 陛下者言語  
不一又四次差人來迎俱無回報因此特差臣等來  
探 陛下回否消息實不曾戴得有衣服靴帽等物  
來 上曰你每回去上覆 當今皇帝并内外文武  
羣臣差來迎我願看守 祖宗陵寢或做百姓也好

若不來接取也先說今人馬擾邊十年也不休我身  
不惜祖宗社稷天下生靈爲重實詢知也先每五  
日進牛羊各一隻以爲上食殊無米菜實奏曰昔  
陛下錦衣玉食今服食惡陋不堪臣有大米數斗  
欲進上曰飲食之類小節也你與我整理大事實  
奏曰王振一宦官爾因何寵之太過終被傾危國家  
以致今日蒙塵之禍上曰王振無事之時人皆不  
說今日有事罪却歸於朕我亦知此人壞大事不能  
去之今悔莫及時伯顏帖木兒適來歷言其故亦如  
也先之詞上賜酒畢令往帖木兒營相見帖木兒

烹羊與伊婦把酒歡飲回見 上皇奉命決議大事  
實以 上昔日任用非人當引咎自責謙退避位忠  
言直諫 上嘉從之日暮深有不忍別之情欲留宿  
館伴者促歸不果因賦一絕云 重整衣冠拜 上  
皇忽聞 天語倍淒涼腥羶滿腹非天祿野草爲居  
異帝鄉始信奸臣專國柄終教胡虜叛天常只今來  
使通和好翠輦南還省建章歸宿也先營中送下程  
羊三隻十二日也先宰馬備酒相待令十餘人彈琵琶  
吹笛兒按拍歌唱歡笑曰你每來可怕我麼實答  
曰古今敵國講和爲上欲要講和必命使臣以通兩

國之情中途有賊寇躬冒危險尚無所怕今到太師  
營中便是一家何怕之有也先喜而然之且曰有理  
的不怕也先曰你每認得 上皇可想他麼實曰爲臣  
盡忠爲子盡孝君父之恩豈可忘乎我每之思 上  
皇如太師之思可汗耳也先曰然既是思想何不迎  
回實答曰朝廷四次差人重齎金帛太師皆不發今  
太師旣肯差我每迎回朝自有厚禮給賞不輕也先  
曰 大明皇帝勅書內只說講和不曾說來迎駕  
太上皇帝留在這裏又做不得我每皇帝是一箇閑  
人諸事難用我還你每千載之後只圖一箇好名兒

尔每回去奏知務差太監一二人老臣三五人來接  
我便差人送去如今送去呵輕易了你每皇帝了再  
不可言待酒畢送下程羊三隻十四日與也先作辭  
備酒相餞曰今我差一人與你每議一人去大同調  
大同并山西黃河一帶人馬說與大同宣府沿邊可  
放人出郊收禾稼打柴草我的人馬也不動你一苗  
差來接駕的人約在八月初五日實答曰差人不差  
人奏知 皇帝請聖旨我每豈敢約期也先曰初五  
日不到你每邊上人民喫苦了再三不敢約也先曰  
若來遲呵可差去兩箇達達同兩箇漢人務要初五



日先到回報正差使臣遲三五日亦可若無人來軍民擾邊我每不失信勉強與決各送馬一匹也先差尚書土木罕同少卿羅綺往大同調回人馬差虜使左丞把禿兒等二十七人共備馬四十二匹貂鼠皮五十張同實等赴京奏事進貢本日辭 上皇帖木兒侍側 上皇再三叮嚀迎復之事惟恐來遲袖出書三封令實齋回 上曰來時衣服可放在宣府便服隨帶來路程遙遠勿辭辛苦當以國家天下蒼生爲念賜酒飲畢令辭帖木兒同伊婦把酒曰大人回去可着人早來圖成大事我每也要回去了實曰

皇帝在此多蒙恭敬奏知 朝廷給賞慰勞送馬一匹復辭 上皇上皇曰你每回去上覆 聖母太后上覆 當今皇帝也先要者非要土地惟要蟒龍織金綵段等物可着早齋來實領命泣下拜辭起行至二十里宿荒送下程羊二隻十五日至中途過午送下程羊一隻宰之宿夫刺失簿禿送下程羊一隻當夜三更起行十六日過績麻嶺山下宿荒十七日從西陽口入關至萬全左衛中飯宿宣府見彼處軍民採打柴草收刈禾粟搬運木料人皆喜悅生意殊盛十八日會稅官驗馬造冊差人奏報仍宿宣府十九

日至土木右丞禿馬指顧曰 上皇在彼被留南朝  
枉有人馬衆多不能戰實曰中國人民多如草芥土  
木失利出於不意未可以爲常理有盛有衰有隆有  
替把禿曰亦非我每勇力乃天的氣候又曰元世祖  
未做皇帝時與敵國戰後遣使往戰國遺鍼二袋羊  
毛一袋世祖怒意謂彼處說兵多於此鍼彼處戰馬  
多於此毛遂與二子并頭目圖往征之后諫不聽後  
果滅敵回至中途世祖病乃載屍還后曰二子不聽  
我諫敵國雖滅爾父不得復生二子告天世祖卽甦  
遂滅金卽帝位二十餘年人馬固多不足恃實曰昔

項羽號霸王英雄蓋世善治軍馬漢高祖寬仁大度  
信任豪傑與項羽戰七十二陣漢高祖皆敗厥後高  
祖一鼓而擒之霸王遂滅有漢四百餘年天下此無  
他蓋因霸王荼毒生靈天怒於上人怨於下况無故  
興兵搶掠上天豈有不厭之耶把秃咬指仰天嘆曰  
大人言者大道理本日宿於懷來時在京運糧二萬石  
至軍士皆悅適 朝廷復差都御史楊善侍郎趙榮  
同虜使平章皮兒馬黑麻同到哈丹等下番議和實將  
虜情與也先應對之詞一應事情并奉迎回 上皇  
之禮備細言之使彼無訛以全終始二十日少卿羅

綺同尚書土木軍往大同調回軍馬軍民俱出郊採  
打柴草實別把禿等預先回京奏事過居庸關遇長  
隨陳容齋 勅命實等將虜使騎坐馬匹留在懷來  
喂養先是已將馬匹并各人懸帶弓箭俱留宣府就  
領 勅齋回過榆河驛宿朝房二十一日復命 上  
御文華殿召實問曰也先有甚麼說話實悉陳前詞  
又問 太上皇帝如何說實拜首奏曰上覆 陛下  
復陳 太上皇帝前旨無遺 上曰也先講和之意  
虛實何如實奏曰臣入番境彼處虜人舉皆喜悅夾  
道謳歌沿途乳酪勸臣等飲之咸願和好蓋用人馬

相繼又曰離家年久窺其和意似有實情但也先萬  
一變詐非臣可知望 陛下處置 上曰一路辛勤  
驚恐賜鈔三千貫羊一隻酒十瓶命太監李三於  
文華殿右廊待酒飯二十二日少卿羅綺同右丞把  
禿等到 京進貢朝見二十三日把禿等奏討使臣  
上不許五府六部數四上章請遣使亦不許二十  
五日實進言其畧曰臣竊謂先差臣等未嘗令迎  
上皇專爲講和今已事完其欲差人迎復之事及定  
約日期皆出也先之口臣特傳說虜情伏望 陛下  
如羣臣之請另差有能大臣奉迎 上皇雖虜情變

詐不測亦可使無詞倘不差人失約則直在彼而曲  
在我耳臣若不言恐日後差人復不用命必曰臣若  
可差臣自揣違期失約決不敢去則彼此猜疑彼此  
猜疑則和議不成和議不成則上皇終不可復干  
戈終不可息邊鄙終不可寧今臣頗測虜情不避鐵  
鉞昧死爲陛下備陳乞早賜乾斷天下生民幸  
甚奉聖旨也先使臣明日趕上楊善待楊善來再  
定奪欽此二十六日把禿等回二十九日早到虜營  
見也先楊善等本日晚到時也先打圍未回楊善等  
八月初二日方見也先子備酒餞上皇行初六日

發程初八日入野狐嶺十一日到萬全左衛演武亭  
駐蹕十二日宣府南城裏駐十三日駐宣府十四  
日到懷來 上皇發書二緘命中使陳容齋回十五  
日至唐家嶺遣使回 京詔文武羣臣言避位之由  
十五日 勅文武羣臣免朝見之禮當日百官至東  
安門外迎接 今上於東安門下輦拜迎 上皇亦  
下轎禮之百官隨至 大內南城殿中 上皇陞座  
百官行禮中始所行之事悉實之言無更噫 上皇  
之所以回鑿 社稷之所以奠安實無分寸之功寓  
於其間特紀歲時云



題爲邊務事景泰元年七月二十一日臣胡濙等會  
太保寧陽侯臣陳懋等并太子太保吏部尚書臣王  
直等於朝房外詢問得禮部右侍郎李實出使自瓦  
刺還言說自出口沿路遇着虜人言說官人你每來  
得甚好我每都要和了回去各進乳酪十分歡喜及  
到也先營裏也先亦歡喜就送羊馬下程言說也先  
我每言語也要不實如今都是的實有天在上急要  
與你國中和了回去早差人來接得 太上皇回也  
得箇好名兒如今我可汗與同阿刺知院已先回去

了你去看你 太上皇及實行三十里纔到營內得見言說如今虜人要和是實情你每回去說可將些衣服段疋來與我做人情着我守 祖宗陵寢也好着我做百姓也好據說臣等切詳虜人悔過請和此是 天地宗廟之福 皇上德威遠布使其慚愧息兵彼此生靈俱免勞苦及 太上皇要守 祖陵宜從所言合無仍差李實將齋衣服等物前去迎接仍勅邊上總兵官各整禦軍馬隄備毋致疎虞謹題本日奉 聖旨虜人言語虛詐多端難以測度李實纔回楊善方去今且不差人也先使臣恁禮部作急整

理遣回仍寫 勅書與他齋回說與也先將送 太  
上皇帝實情務要分付楊善明白上緊打發回來也  
先必遣人同送來到日一發定奪緣遣已有 勅書  
去了欽此

題爲禮儀事景泰元年八月初九日欽奉 勅命得  
都御史楊善奏已迎 太上皇帝回京尔卽具迎接  
朝見儀以聞如 勅奉行欽此欽遵合行議禮儀逐  
一開坐具題請旨

一禮部堂上官一員至龍虎臺迎接

一錦衣衛差堂上官一員帶領官校執 丹陛駕

并擡輦轎至居庸關裏迎接

一光祿寺差官牌尉役擡酒飯至龍虎臺及清河  
二處迎接

一各衙門官至土城門外迎接行叩頭禮

一總督并各營總兵官俱於教場門口迎接行叩  
頭禮

太上皇帝車駕從安定門至東安門外於東上北門  
南面坐 皇帝出見畢文武百官行五拜三叩  
頭禮畢 太上皇帝由東上南門入南城大內  
當日百官於奉天門奏奉

聖旨是居庸關裏接用轎一乘馬二匹 丹陛駕於  
安定門裏接欽此

禮部議到禮儀開坐具題奉 聖旨是居庸關裏接  
只用轎一乘馬二匹 丹陛駕於安定門裏迎接欽  
此除欽遵外考之唐史玄宗遭天寶之亂避難西蜀  
肅宗卽位靈武尊玄宗爲上皇大帝後肅宗復兩京  
迎上皇還京上皇至咸陽肅宗備法駕迎於望賢樓  
上皇在宮南樓肅宗着紫袍望樓下馬趨進拜舞於  
樓下上皇降樓抱肅宗而泣解黃袍自爲肅宗着之  
肅宗伏地頓首固辭上皇曰天數人心皆歸於汝使

朕得保養餘齡汝之孝也肅宗乃受之此前已行之  
盛典實當可效之良規已茲若欽遵欽依事理只備  
駕於安定門裏迎接不無失之太簡而禮節有所缺  
遺使外夷無所觀瞻亦恐起宗室輕主上及下人之  
譏議特會官重定禮儀開坐本月十一日太子太傅  
兼禮部尚書臣胡濙等於奉天門奏事奉 聖旨虜  
人譎詐未全憑信欲備大禮迎接恐墮賊計因此只  
用車馬迎接待伺真偽之情但得 大兄入城 宗  
廟奠安親親尊讓之禮朕自處置今若 太上皇帝  
車駕入東安門朕於門裏迎接行叩頭禮畢朕同文

武官員隨至南城內便殿中見 太上皇帝陞坐朕

行禮畢文武官員

禮行

悉遵朕命再不許分更欽此

本月十五日禮部題奏爲陳言事奉 聖旨尊親孝

悌某所當然近得虜管走回之人稍帶 太上皇言

太師也先果送朕來迎接之禮尤須簡畧因此悉遵

行今言太薄則譏乎朕事旣行定不許妄言欽此

本日奉 太上皇帝詔告文武羣臣朕以不明爲權

奸所誤致陷於虜廷已嘗寓書朕弟嗣皇帝位典神

器奉欽 宗祀此古今制事之宜 皇帝執中之道

也朕今幸賴 天地祖宗之靈 母后皇帝憫念之

切俾虜悔過送朕還京 郊社宗廟之禮大事旣不可預 國家機務朕弟惟宜爾文武羣臣務悉心以匡其不逮以福蒼生於無窮朕到京日迎接之禮悉從簡畧布告有位咸體 朕懷

太上皇帝勅諭文武羣臣 朕以眇躬昔受 先帝遺命 祖宗洪業俾付於朕深惟負荷之恩朝夕惶懼以圖治理去年秋醜虜傲虐背恩負義拘我信使率衆犯邊有竊神器之意 朕不得已親率六軍往問其罪不意天示譴罰被留虜中屢蒙 聖母上聖皇太后 皇帝賢弟篤念親親之恩數遣人迎取上



賴 天地大恩 祖宗洪福幸得還 京爾文武羣  
臣欲請重以迎接之禮朕辱國喪師有玷 宗廟有  
何面見爾羣臣所請不允故諭

廣信府同知鄒 潘

推官方 重校正

臨江府推官袁長馭校正

上饒縣學教諭余學申對讀

湖州府後學吳仕旦覆訂





正統臨戎錄

撰人 不詳

正統臨戎錄

本館據紀錄彙編  
本影印初編各叢  
書僅有此本

紀錄彙編卷之十九

正統臨戎錄

錦衣衛指揮使楊銘正統十三年二月內同父楊只  
隨同金吾左衛指揮使王喜往瓦刺公幹回還十四  
年二月內隨父同指揮使吳良齋送賞賜往瓦刺地  
回也先太師處五月內到於地名邊克哈扎兒本月  
內有也先行營叫我每使臣都近前說道你每爲大  
道理來不曾來作反有我這裏差去買賣回回把我  
的 大明皇帝前去的使臣數內留下了我每奏討

物件也不肯與我每去的使臣故買賣的鍋鞍子等物都不肯着買了既兩家做了一家好好的往來把賞賜也減了因這等上我告天會同脫脫不花王衆頭目每將你每使臣存留分散各愛馬養活着我領人馬到邊上着看一看比先大元皇帝一統天下人民都是大元皇帝的來我到邊上看了大明皇帝知道我回來打發你每回去衆人啼哭當日待我每分散又將我每自己帶去輜重駝馬等物各愛馬分用了有把郎苦使平章那哈台分去的使臣吳俊等得脫拐馬去出到邊赴京奏報七月內有也先領大衆

人馬犯邊將我每各使臣脚帶木枷每人着四箇達  
子看守夜晚綁縛有也先到邊將大同等處人馬殺  
搶回來又於八月復領人馬犯邊至本月二十六日  
轉到金山哨馬處見我每使臣叫靠前來說道你每  
都好了如今天的氣候上 大明皇帝來了親自見  
你每的這每苦楚也不罪你每了 皇帝若不見時  
我便放你每回去 皇帝也不信 大明皇帝到來  
我這裏聚會了差使臣和你每一同送 皇帝回去  
衆人聽說了與也先磕頭有也先傳說將我每木枷  
開放往各原養活的主人人家去次日在金山我父子二

人與原看守達子取討馬乳一皮袋尋看 爺爺朝見 爺爺見了問使臣紀信那裏來的是誰紀信回奏是原做使臣來的老哈父子近前叩頭進馬乳畢有伯顏帖木兒那營往東行有紀信李虎袁彬隨駕我父子當爲達子營奉 聖旨再來看我後銘父子尋取米麪又去朝見後又將自己穿的衣服換羊一隻又去朝見進羊畢奉 聖旨着老哈你回達子營去着哈銘在這裏答應我銘自此晝夜隨侍間聞 聖旨備說本年八月內我領人馬到於大同覆回也先太師等追襲我到宣府不見人住扎有伯顏帖



木兒來時擺下着傳報馬傳說今遇見 大明皇帝  
駕了着也先作急領人馬前來對敵有也先當時就  
領人馬各自分路將官軍圍困殺敗後在土木扎營  
也先領人馬直至土木我差大吉馬亮前去與也先  
荅話講和也先差使臣同大吉前來未到我營我起  
營了差來使臣察羶就將大吉殺了也先來將我營  
亂了我下馬蟠膝面南坐有一達子來剥我衣甲我  
不服他剥達子要傷害我有達子兄到來問說怎麼  
的達子回說我要他的衣甲不肯與我達子兄說這  
箇人不是等閒的人動靜不象箇小人兒就將我拏

去見也先弟賽刊王我就問你是也先麼你是伯顏  
帖木兒麼你是賽刊王麼你是大同王麼賽刊王驚  
懼不花就上馬去見也先說我的愛馬的孛將一箇  
人來見我問那顏名字問我的名字問大同王的名  
字怕不是 大明皇帝我來報得那顏知道也先說  
這箇人在那裏領來我看當時也先就在帳房內叫  
原來我每處做使臣的哈巴國師哈者阿里平章來  
看是 大明皇帝也不是我見了他就叫他二人名  
字二人驚懼與我磕頭回也先說是 大明皇帝嘗  
時也先聚衆大小頭目說道我每問天上求討大元

皇帝一統天下來今得了 大明皇帝到我每手裏  
你每頭目怎麼計較數中有一達子名喚乃公言說  
大明皇帝是我每大元皇帝讐人今上天可憐見  
那顏上恩賜與了到手裏口發惡言傷害當有伯顏  
帖木兒忿怒言說那顏要這等反狗似的人在跟前  
開口說話當時把乃公面上搥了兩拳說道那顏只  
萬年的好名頭 大明皇帝是雲端裏的皇帝上天  
不知因那些恠怒他推下來數萬的人馬着刀的着  
箭的躡死的壓死的 皇帝身上怎麼箭也不曾傷  
他刀也不曾砍他怎麼人也不躡着他他的洪福還

高還在裏拏住他時怎麼就問那顏的名字怎麼問我每的大小頭目的名頭他不曾做反我每也曾受他的好賞賜好九龍蟒龍天地恠怒上今日到我每的手裏上天不曾着他死我每怎麼害他性命那顏圖萬年的好名頭落在書冊上差人去報他家裏知道着差好人來取那顏這裏差好人送去復在寶位上坐着却不是萬年的好名衆頭目聽說了齊說道那顏特却院說的是也先說伯顏帖木兒你就把皇帝領了去養活他有伯顏帖木兒回說是我養活他就領了我去當有也先尋得我在前差去和番的

使臣梁貴來見我就差梁貴同達子的使臣到家奏報又有回子撒夫刺對梁貴說你替我 皇帝前奏我在營裏拏了一箇識字的人我進與 皇帝伏侍我就着他領來看有撒夫刺把袁彬領來我問他你是甚麼人袁彬說我是識字的人後有也先起營行至宣府着袁彬等叫城有城上總兵太監等官不認放鎗要打次日起營往西行大同着袁彬叫城有總兵等官廣寧伯等親自出城來朝見將大同庫內銀兩表裏等物進來賞賜也先等衆頭目每往北行我與也先同差太監喜寧等同達子使臣赴京奏報去

等語 爺爺說的話與伯顏帖木兒等言語相同後朝裏差都指揮岳謙等同太監喜寧齋送賞賜與也先處見 爺爺奏說家裏如今要立郕王做皇帝我再三言說也先誠心要送 皇帝回來你且不要立朝裏不肯信只要立 郕王做皇帝十月初三日有也先聚會衆頭目殺馬筵席復立 爺爺做皇帝慶賀了進大白馬一匹初五日領人馬起營送 爺爺回京銘父子見 聖駕馬生騎不得進良馬一匹初七日到大同在東門外荅話城裏總兵等官不差人迎接當日到陽和城外館驛有守備等官齋捧羊酒

米麪進次日有太監喜寧就與 爺爺說今也先領人馬不往大路去往紫荆關進腹裏到北京有太監喜寧忠勇伯把台同也先弟大同王領前哨馬行至廣昌也先傳說不許搶殺有部下達子私下搶殺銘隨 聖駕不離左右尋來麪做乾糧預備答應次日在於廣昌進山行走山深路險步行隨 聖駕拏馬鼻孔流血 聖駕見銘不忍教人替換到於紫荆關外夜晚山空宿歇夜至四更 聖駕宣叫哈銘去尋喜寧不敢推却當時去尋有也先起營了聽得吹號頭銜鑼響銘跟隨扒山到天明也先忽回頭問是誰

銘回說是我也先吃驚說你在那裏來我說奉 聖  
旨差來尋喜寧太監也先說早里太監在後頭里你  
的馬壞了到於關裏天亮辰時牌喜寧太監到問說  
哈銘你在那裏來銘說 爺爺差我來尋老爺說話  
太監回說罷了你去 爺爺前奏到前頭下營處說  
話太監前去了行至關裏館驛邊等候 聖駕到問  
喜寧太監銘將太監前言回奏 聖駕說哈銘你上  
馬銘回奏馬乏了後父親到同父步行到於易州  
聖駕扎營差銘等你去尋些果子送與伯顏帖木兒  
吃有易州百姓收放各樣果子檯至 聖駕前送與



伯顏帖木兒時知院當夜三更後有季鐸同去達子  
那哈赤等趕上齋勅來朝裏事情當時宣銘去尋太  
監喜寧岳謙張官保吳良梁貴銘回奏馬乏了沒馬  
騎有余志敬不從 聖駕恠怒方纔與馬去尋有大  
勢達子身披衣甲手拏弓箭坐令邀喝甚麼人那裏  
去應說是哈銘 聖旨差來尋喜寧太監去又問左  
右達子太師在那裏下營達子回說太師在塔底下  
下營你往塔底下尋去銘沿途跟問至塔見岳謙等  
岳謙問說你在那裏來銘說今有季鐸那哈赤後頭  
來趕上 聖旨差我來尋太監及衆大人去計議岳

謙回說罷了有家難奔有家難逃投差我每齋賞賜來取 上位今也先領大勢達子把關打破子來到腹裏有甚麼面目見家裏早里待太亮會同喜太監見 聖駕去往東行到於涿州有官吏人等進羊酒等物來見奉 聖旨差銘送羊酒與也先處次日到於果園扎營有管園官員將果品等物來見又奉 聖旨差銘送果品與也先處當又同喜寧太監計議齋勅入城奉 聖旨吳良梁貴去有張官保當時說我是家裏差送賞賜來的到不差去到差他每去 爺爺聽說就差岳謙張官保盡行殺了後又差季鐸同

那哈赤到彰義門見官軍擒獲得緊脫走回營了十三日又差指揮吳良齋勅入城當晚在於德勝門外北邊猪房有達子捉到看墳內使阮曠送至駕前當日奉聖旨差誰同內使賚勅入城去有多人不應銘回奏我去奉聖旨說道你年小在這裏答應我銘回奏不要我去時着我父親去有伯顏帖木兒說他年紀小他的忠心爲皇帝空有這些人在沒個開口爲皇帝捨性命去是教他老子去次日差父親同內使入城十五日有也先同聖駕領人馬到於德勝門外土城朝裏將吳良陞都指揮阮曠陞內官父親陞正千戶差同鴻臚寺卿趙榮

等齋送羊酒俱見聖駕前說話奉聖旨家裏怎麼沒大官人出來也先問這個都是甚麼職事爺爺回說這箇都是小官人有季鐸說是中書舍人也先亦說大臣怎麼不出來接皇帝進去養狗還認得主人我把皇帝送到門口都不來接皇帝進去有聖旨你每都回去到家裏說教大臣每出來見太師接我進去當時趙榮等就回有也先怪惱不待回報就同聖駕出土城往北行也先傳說但是跟皇帝身邊閒雜人都教他進城去當日盡陸續進城至晚駕在猪房宿歇十六日早也先起營傳說教皇帝起馬有太監喜寧同忠勇伯把台等跟隨

也先前去不知那裏下營止有袁彬同銘二人隨

聖駕當日早起營有袁彬放聲哭說罷了我家裏母  
年老無人侍養怎麼好銘勸哥不必煩惱你我如草  
木沙土一般有甚麼打緊 爺爺的金身在這裏只  
管收拾備馬馱行李銘說没人牽這馱垛馬奏說問  
達子討一兩箇被虜的小廝牽馱垛馬奉 聖旨是  
問達子討時問達子銘安討得被虜人漢小廝兩箇  
牽馬就起營往西行着銘在左右手下籠馬並行過  
溝澗山崖是銘下馬扶持 聖駕過到平地上馬依  
舊籠馬並行夜晚到於小村駐扎有銘將馱垛卸下

搭了帳房尋取馬草回還奉 聖旨哈銘你去尋馬  
草去了你不在時我教袁彬去尋水來我吃被達子  
名敏安說他逃走將袁彬打了幾刀背將銀一條十  
兩與了他次日收拾往西行奉 聖旨你去尋太師  
在那裏教喜太監來說話至卯時見人馬一字擺着  
往西行是銘見來得勢重想必是也先夾馬緊走有  
也先差伯顏帖木兒同弟大同王太監喜寧忠勇伯  
把台等前來銘傳說 爺爺着我來叫太監說話有  
伯顏帖木兒等同太監親見 聖駕奏說太師誠心  
送 皇帝來到你的城門前你的家裏兄弟做了皇

帝你的臣宰悖了你的恩不肯出來認你接你進去  
做皇帝因此太師領人馬回了太師說道待到陽和  
城裏那裏着使臣送皇帝順大路往居庸關上回去着  
皇帝寬心不要見了京城想 娘娘憂戚出病來

有些好歹到壞了我的名頭等語到於易州夜晚住  
歇使劉婆兒取水做飯進畢又煮肉帶將皮袋防備  
爺爺充饑次日過關銘奏說到大同有我的親戚  
在 爺爺教我時我進城去奉 聖旨哈銘你怎  
麼捨得撇了我去銘回奏 爺爺不着我去時至死  
粉骨碎身也不敢去夜晚到關外歇了至五更有喜

太監聲叫 上位在那里有銘與袁彬把台聽應說  
在這裏有喜太監放聲大哭罷了有我家人伴當將  
我的馱垛行李盡行拐去了是銘請 聖駕起收拾  
前行二日到陽和有達子遇見打柴草使車的人都  
殺了將柴草車輛都搶了有喜寧同把台及也先弟  
大同王言說太師說到陽和往大路上要差使臣送  
皇帝回往居庸關進去來如今把打柴草的人都  
殺了車牛搶了怎麼差人送去有忠勇伯說謂這裏  
中不差人送 皇帝去還到營裏差使臣到朝裏討  
得使臣來接 皇帝回去纔是禮這等就差人送去



也輕易了因此次日往西北出陽和後口夜晚下雪  
銘等將雪撥開搭帳房歇子一夜次日往北行貓兒  
莊裏邊歇一夜出大邊牆次日往卽寧海子東岸行  
二日至達子營夜晚銘等搭帳房了有原搶漢人逃  
走達子拏出要殺銘因此勸達了舞手將刀要砍  
聖駕看見奉 聖旨哈銘你進來罷銘回奏 爺爺  
不妨事且過一夜起營往西北行至地名小黃河東到  
於伯顏帖木兒家小營內有伯顏帖木兒的妻何搭  
刺哈荒忙令使女搭羶帳請 聖駕住歇佳飯進膳  
住了幾日那營往西行住扎後十一月十一日遇

聖節有也先親來與 爺爺上壽進黃蟒龍貂鼠皮  
襖殺馬做筵席計議差人討使臣奉 聖旨就差人  
受送去罷不必討使臣後太監喜寧與忠勇伯把台  
說都是袁彬這廝每年紀小想家裏撥置 皇帝將  
這廝每都殺了銘說與袁彬有袁彬慌了哀奏奉  
聖旨哈銘你去與太監說不干袁彬事是銘傳奉  
聖旨饒了後差使臣計安蘇斌等赴京奏討使臣到  
宣府地方盡行殺了後起營往西行到於地名牛頭  
山後又那營到地名闡上奉 聖旨袁彬哈銘到家  
俱陞千戶銘等叩頭謝 恩外有 爺爺思想水吃

天道寒冷冰凍無水着銘尋水直去尋得向陽煖泉  
將冰打開取水進上又行營到於八寶山大青山  
沈塔處太監喜寧來與爺爺計議要和也先領人  
馬請爺爺同去到甘州教劉馬太監毛忠都督等  
接了爺爺將一帶人馬收拾奪了陝西爺爺坐  
了去取南京等語後太監去後是銘奏說天道寒冷  
着不得馬凍了頭臉手脚時到那裏他也不肯出來  
迎接奉聖旨是當時就差銘你將這話對伯顏帖  
木兒說着與太師說去便去到那里他也不認後太  
監說都是哈銘這廝每打攪把這廝每都殺了纔没人

打攪是銘見天道寒冷與伯顏帖木兒討車一輛駱駝一隻但行營 爺爺坐車內將貓皮褲禪坐遮蓋後又差使臣張能等來京取討使臣不回臘月內有伯顏帖木兒親領人馬同大同王等衆頭目往寧夏高橋兒一帶搶掠去了有李鐸喜寧帶去使臣段疋衣服等物被伯顏帖木兒家人達子強分用了有喜寧來說多人的東西被他分用了 爺爺着哈銘去與他娘子說追究出來與他每太監去後是銘回奏 爺爺不中他各人俱用了去虎口奪食去一般我每如今見在困中就與娘子說了討出來時他各人

拏去了達子每不和我每致怨袁彬說 爺爺使你  
不動你強 爺爺因恠怒將銘打了幾下銘啼哭了  
進檀帳與 爺爺磕頭 爺爺說我打你你怎麼又  
來磕頭銘回奏我撇了父母兄弟家道只爲 爺爺  
上來如何不磕頭後伯顏帖木兒妻知覺將家人分  
散段子等物一一追出送到 聖駕前後太監喜寧  
得知都來一一討去了 爺爺謂哈銘曰你前番強  
到強得是今果然都來拏去了至正月初一日 爺  
爺燒表告 天燒表已畢有也先差人來請 聖駕  
到於地名斷頭山營裏做年同妻并大小頭目遞皮

條慶賀本月內 聖駕賞銘網巾一頂金圈一付奉  
聖旨哈銘這圈兒你不要使了叩頭謝 恩二月  
內在於地名東勝州地方 爺爺差銘往太監喜寧  
處看太監做甚麼銘到太監處太監問銘那裏來銘  
回說 爺爺教我來看老爹來問 爺爺說甚麼銘  
說 爺爺說差去家衆人去的人不來沒箇信怎麼  
好幾時得回去太監說差去的人家裏不放來銘說  
家裏不說有 爺爺只說老爺在這裏如今差了人  
到家裏也不信如今只得老爹到邊上纔得箇虛實  
好友太監說我如今要去時也先太師也不肯着我

去銘說老爺爲 爺爺上來 爺爺教老爹去太師不肯留你老爹不要到朝裏只到邊上今見有季鐸帶來送賞賜的高旺李成在這裏老爹帶一箇去討了達子使臣到邊上打發他進京去討了信息回來老爹肯去時我如今回去 爺爺上奏央伯顏帖木兒特知院轉與太師說銘當時回去將前情一一奏說 爺爺說道你先去與伯顏帖木兒處說我就來與他說話當時有伯顏帖木兒同妻出羶帳迎接到帳內 爺爺將前情對伯顏帖木兒說有伯顏帖木兒回奏 皇帝着太監去時太師怎麼留他他是

皇帝的人他是誰的狗 皇帝着他去他怎麼敢不去 皇帝着我去時我也只得去哈銘你今日拏下馬明日我同你兩箇早去太師跟前說當時 聖駕回次日伯顏帖木兒同銘到太師處說前情當有太師叫喜太監說 皇帝着你去送使臣到邊上去你去不去太監回說太師要差人着我去時我去太師說道你願去時我不留你你不願去時不强教你去有些好歹時你也不要怨我太監說道我去銘當時回還奏說今有大師着伯顏帖木兒差人和太監去我每這裏伏侍 爺爺的也着一箇人去奉 聖旨



哈銘着那箇去銘回奏着高旺去銘當與高旺說你有年紀了走過世路你到邊上着家裏事情如今這裏凡事都是太監主張沒他時我每纔好說話你到邊上仔細小心自討分曉再三囑他去有伯顏帖木兒當時就差那哈赤同太監去有太監在 爺爺擅帳內歇了一夜次日早奉 聖旨差袁彬哈銘兩箇去送銘等送至東南二三十里回還時落微雨奉 聖旨哈銘袁彬你兩箇知道麼銘等回奏不知 爺爺說這雨不是好雨喜寧這去不好這雨是洗屍的雨後過五七日有達子傳說去的太監口子上拏了

爺爺不信恠那說的達子又過三兩日是以有太監家人北京奴走回說太監到在此於野狐嶺住扎有高旺到邊與墩臺上軍人答話往來設計罷野狐嶺臺上放砲將太監并家人猛充都拏了北京奴脫走回了 爺爺差去使臣那哈赤北京奴回奏地的元刺馬乏了去換馬我每先到關上拏了太監他纔到因此走回了 爺爺說喜寧這去不好這雨是洗屍的雨果然後太監無了差銘也先處往來說話纔的自任聽信又於本月內有也先親自來帳殿望看言說 皇帝日頭出至日頭落處往來的人多吃了

皇帝的鹽米茶飯許多的臣宰聽見前番宮裏 皇帝領出米大小四十萬人天地的恠怒上 皇帝上都不得濟你如今只得了哈銘的濟了你的饑飽冷熱他不說我每怎麼的知道他和你的身口一般我兩箇坐着不得他我說的你也不知道你說的我也不知道我有箇比論 皇帝上說哈銘你不要怕你說是我說的話一日一朝 皇帝也爲自家人烟上與及人兩箇相爭落在及人手裏止則有本他國一箇人做伴一日天意回了 皇帝不得回他本國坐了 皇帝位兒還管他的人烟那時止得了這箇人

的濟做了 皇帝時把這箇人忘了他不尋這箇人也不擡舉他十分虧了這箇人的心一日 皇帝早朝多官衆會聞這箇人把一隻手擡起伸出一箇指頭來 皇帝在金臺上坐着說道那兩箇人是甚麼人拏了有這箇人回說彼時只有我一箇人來後

皇帝與了他官做了 皇帝你若回朝時天可憐見你的洪福大 皇帝位子坐時把哈銘不要忘了好生擡舉 皇帝回說官人說的是我不忘了我擡舉他也先說這每便好也先又說 皇帝你没下飯我送四十隻大羊來令頭目孛來進羊四十隻後行營

有被虜女人大小怨哭煩惱一日銘與袁彬及達子也先帖木兒等同在 爺爺前奏說吃金一心願忠朝廷若 駕有好歹時銘等務要奉金身歸 朝廷如銘等有好歹時亦願 爺爺深埋着不要觸汗天地使鴉鳥殘吃又三月內大同邊上也先太師發去哨馬捉來的漢人送至 御前審問說有石總兵領人馬巡邊見在大同住扎也先會同大小頭目計議差賽刊王等領三千哨馬在大同地方晝夜好生巡哨着如今青草還少馬又不得馬飽待馬飽時就同皇帝多衆人馬到大同和他答話他若接了 皇

帝去罷他若不接 皇帝圍在大同不要放他出去  
後石總兵領人馬回往鴈門關進也先弟知覺領三  
千人馬直追殺至代州搶掠回了也先聽得石總兵  
脫了要將弟以軍法殺斬衆頭目再三哀告饒了後  
四月內行營間銘奏說 爺爺怎麼好幾時得家去  
爺爺說如今不得回去我若得回去便去逍遙府  
也去坐去銘不思啼哭回奏 爺爺爲天下出來不  
曾來打圍看景怎麼說去逍遙府坐皆是天意未回  
爺爺寬心又於本月內在於豐州地方有伯顏帖  
木兒妻令使女阿失加問銘你每天道煖和夜晚燒

火做甚麼銘回說我每無甚麼做早煮肉吃就睡了  
我每五七人在一氈帳睡那地方燒火有使女  
說我每只見你氈帳上有火光只說道你每燒火後  
伯顏帖木兒妻等說道是 皇帝洪福光現後伯顏  
帖木兒不在奉 聖旨着銘和他娘子說特知院來  
家着方便說送我每回去罷有伯顏帖木兒妻阿撻  
刺阿哈言說 皇帝上去奏我是箇女人我的言語  
到得那裏我的官人洗手時遞着揩手的手帕時好  
歹也說得一句話後伯顏帖木兒放鷹得了一箇野  
雞回來將酒一瓶來 爺爺氈帳裏進叫銘 皇帝

上奏我今日放鷹得了一箇野雞我若得兩箇特進  
一箇來我得了一箇我自家特來 皇帝上進酒散  
悶進酒間又叫銘說道我有比喻你 皇帝上奏大  
海裏水潮時一箇大魚隨朝水落在淺水灘裏大海  
裏的魚怎麼在淺水裏住得這箇魚急了還要歸大  
海裏去潮水時候不到怎麼得到淺水根前潮水時  
候到時接着淺水這箇魚還歸大海裏去了 皇帝  
你寬心你不要心急你得時候到了時留不住自然  
回去了好互見 娘娘你心懣憂出病來有些好互  
没人替你 皇帝寬心五月內送銘伴送李成齋勅



到大同銘復回隨侍在于金山差銘又來大同討信

回還復奏次日早奉 聖旨哈銘你知道銘叩首回

奏不知道你昨夜一隻手壓在我胸前我不曾推下  
你的去直待你醒了翻身擡下去是你爲我辛苦困  
了不知道漢時光武皇帝與嚴子陵同宿嚴子陵脚  
壓在光武皇帝身上也只等他自翻身擡下去你到  
比他一般銘回奏該萬死奉 聖旨到家與你都指

揮做欽此叩頭謝 恩外有伯顏帖木兒同也先在

下水海子一帶住扎被墩上瞭高官軍偷馬打攪要  
將墩臺圍困砲倒將人殺害是銘再三也先處哀告

如今要差人往來和好今將墩臺砲倒時 大明皇帝一發不信有講和之意只可奏 皇帝寫 勅書 叫墩上人下來齋 勅往各邊城裏去曉諭是好也 先聽允就差伯顏帖木兒刺來叅政等同銘齋 爺 爺勅書到于各墩曉諭了後忽遇驟雨一陣霹靂一聲伯顏帖木兒等懼怕次日就領人馬回本營了六月內也先哨馬于分嶺墩捉獲夜不收李貴到于金山也先處隨差使臣送至 御前審問情由仍差銘 伴送李貴到于大同放進入城銘與總兵等官荅應 話又到山陰轉帶夜不收王智同見 聖駕當日又

見也先有王智親說如今朝裏說沒有 皇帝說有

也不信若信有 皇帝時送 皇帝到大同總兵等

官見了纔信次日也先差伯顏帖木兒等自領人馬

同 聖駕到大同見得大同說計請 駕衆達子知

計將銘恠怒要殺伯顏帖木兒言說 皇帝把你當

眼目心腹一般你往來兩日與城裏人說話你和他

一心害我每若養狗時也認得主人銘回說我並不知

道當有也先弟賽刊王說我的人在先時趕他城裏的

人往東邊小門裏進去城樓上放下閘板把我的人

拏了我和你說你也不信又有字來勸說是哈銘不

知道你也不要恠他有伯顏帖木兒言說我每若進去中了他的計只爭一分不曾落在狗口裏死了銘方存命衆達子知計復回銘奏要差使臣往北京去奉 欽依着誰去銘回奏銘自去奉 聖旨是你去

欽此銘又奏央伯顏帖木兒太師上說討使臣奉

聖旨是當時就與伯顏帖木兒說前情依從行至關山東北地名失把兒禿次日早同伯顏帖木兒到也先處有也先太師在于地名九十九箇海子放鷹銘見也先言說 上皇帝差我來那顏上說差使臣往大明皇帝上取討使臣來見那顏接我回去那顏

的鈞旨知道大師言說我與衆頭目每計較就叫伯  
顏帖木兒如今這事怎麼說伯顏帖木兒回說那顏  
和衆頭目每計較差使臣我每

皇帝上說銘去大同迎接使臣聽見那顏的忠心這  
每呵使臣來的也喜歡也先又問你見了 皇帝也  
曾銘回說不曾見 皇帝也先說 皇帝爲你去了  
憂出病來快着人伴送哈銘去見 皇帝喜歡着當  
時着人送銘見 駕奉 聖旨那箇來了銘回奏楊  
善王息來了脫脫不花王處有趙榮湯胤勣去了  
爺爺說楊善王息是舊人十分歡喜及問家裏詳細  
銘又歇一夜將總兵官郭登所說言語奏知奉 聖  
旨是銘當又將母親所製進白絹汗衫一件白絹底

衣一件進  爺爺穿用了次日伯顏帖木兒差那哈赤同銘又回到大同同迎接使臣楊善等俱見也先也先見了楊善等十分喜歡以禮相待初五日聚會約在初八日送駕銘又奉  聖旨差與也先說送我回時往宣府路上去近便若差人去報喜時着來宣府迎接有也先說道你回去  皇帝上奏我誠心只要送  皇帝回去隨  皇帝往那裏去我這裏差大使臣送去銘回奏畢果於初八日也先送  爺爺上馬會大小頭目殺牛馬做筵席請  聖駕動樂吹唱同妻及衆頭目每行禮進酒進鞍馬貂鼠皮襖弓箭

送行行一里之上也有也先弟賽刊王亦領衆頭目打  
野盤進酒行禮又與 爺爺送行有伯顏帖木兒自  
備全副鞍馬弓箭撒袋貂鼠皮襖與 爺爺送行  
聖駕上馬初九日晚行至野狐嶺西北差銘同達子  
一名往宣府報喜夜至三更到萬全城邊聲叫 爺  
爺分付說社稷爲重虜情多有譎詐總兵等官不必  
遠接只差官軍齋捧羊酒出關迎接管待送來的達  
子頭目每總兵等官聽說口稱 明主萬歲望西北  
叩頭銘當時回至野狐嶺歇了次日早出野狐嶺往  
西北恭遇 聖駕銘回奏前情 爺爺十分歡喜當



有總兵等官差官齎捧羊酒出境迎接有伯顏帖木兒等送至野狐嶺帳房內進酒畢伯顏帖木兒將多人趕出遠站着銘 皇帝上奏說道彼時你領人馬出來時爲你的天下看你的邊城出來天地恠怒上落在我每太師的手裏我每太師與衆頭目計議天没曾着 大明皇帝死 每怎麼害他死我每太師順天意好生敬重着我每伏侍了 皇帝一年今日天可憐見 皇帝回去今日你兄弟在家做了皇帝皇帝位子是你的你到家不要怕大小臣宰每說我爲天下爲邊城領人馬出去來天地恠怒上我每落

在人的手裏天可憐見我今日回來了緣皇帝的位  
子是我的你還要你的 皇帝位子坐今我伏侍你  
一年太師今日着我送 皇帝來我這等心裏的話  
奏在 皇帝心裏知道我每這裏怎保得長勝長太  
平比先漢王與霸王兩箇爭皇帝天下霸王與漢王  
殺七十二遭後天可憐見漢王一遭殺了霸王就得  
天下做了皇帝你若回家去坐了皇帝位時就是我  
的主人一般我這裏有些好友我便表投你話畢  
爺爺出帳房宣銘跟我來銘回奏馬不在奉 聖旨  
就將我的從馬來跟至東北令銘拏馬劉婆兒跟來

後令劉婆兒拏馬候 聖旨又宣銘 聖面向西南  
銘跪在地奉 聖旨哈銘這大事都是你成了功勞  
是你的到家教你做大官人欽此叩頭謝 恩外  
聖駕行有送來衆達子進馬楊善曰叫 上位行了  
罷奉 聖旨說他都在地上跪着進馬怎麼行得後  
行至野狐嶺口邊有伯顏帖木兒俺克太平章同楊  
善忠勇伯站在東南邊銘奏說 爺爺今有伯顏帖  
木兒伏侍 爺爺一年送到這裏了 爺爺把馬帶  
回來說一聲奉 聖旨是着哈銘與說多定害生受  
你我進口去有伯顏帖木兒聞 聖旨放聲大哭我

說道我的 皇帝今日進去了再幾時得見後進關  
伯顏帖木兒回了 爺爺數里聽得後馬響官軍驚  
疑奉 聖旨着哈看甚麼人銘回奏鎖那俺帶領達  
子數十人緊走馬前來有鎖那俺奏說 皇帝的洪  
福特知院回去放開圍場得了箇野牲就差我這幾  
箇人來 皇帝上進就將鎖那俺等帶隨 聖駕至  
晚引於萬全右衛教場官廳內安歇次日到于宣府  
住歇一日擺宴有少監郭敏進膳將膳桌上的吃食  
等物奉 聖旨哈銘分與鎖那俺等拏去與伯顏帖  
木兒特知院掩克平章有總兵官朱謙萬全都司都

指揮董斌在於 御前答應管理賞賜給賞外夷畢

奉 聖旨哈銘選達子的數內好的頭樣五九馬編

成天字號進與娘娘選四九編成地字號與景泰皇

帝選三九與 東宮選畢奉 聖旨哈銘你來我有

一件事和你計較今張四征南回來在家我賞匹馬

與他中不中銘回奏 爺爺好一發賞與他一對奉

聖旨誰帶去與他銘回奏今有原跟他的頭目米

六見做使臣來這裏就着他帶去到家與他奉 聖

旨是就選青白馬二匹與米六帶去在宣府住一日

早銘請 聖駕起奉 聖旨哈銘去請使臣達子刺

來等起馬行至雞鳴山遇見家裏差來太監夏時在  
彼搭帳殿預備接 聖駕請 聖駕下馬進膳畢起  
馬又見內臣迎相遇見 聖駕放聲啼哭奉 聖旨  
哈銘先去前頭懷來看怎麼迎接銘到懷來西關見  
搭帳殿膳房尚膳監光祿寺叅將楊信率領人馬迎  
接銘當時回奏至晚 聖駕到懷來歇一夜次日早  
起馬到居庸關巡關御史王洪等迎接到館驛進膳  
畢當時起馬八月十五日行至唐家嶺學士商輅等  
馬一匹進晚膳奉 聖旨哈銘來叫內官內使打點  
家去的東西將我的鋪蓋靴子與哈銘拏去家裏與

子孫作古銘領畢叩頭謝 恩外次日早奉 聖旨

着哈銘你去趕上馬分付在東華門外光祿寺一帶

擺着當時回至清河候 駕進早膳回奏畢起馬到

於德勝門土城教場門外總兵官石亨張四楊洪少

保于謙朝見叩頭入東教場門奉 聖旨宣張四馬

上說話 聖駕到安定門在甕城廟裏換袍服宣銘

你去家好生擺着馬銘回奏去不得家裏十分緊奉

聖旨既去不得罷你去上馬我升轎隨至東安門

外 爺爺進東門銘奏說去鴻臚寺報名而退次日

朝見本月二十六日太監興安傳奉 聖旨哈銘陞

一級校尉袁彬陞試百戶欽此陞銘實授所鎮撫

天順元年正月十七日 爺爺復登寶位陞銘錦衣

衛指揮僉事天順五年七月初二日擒殺反賊曹欽

等有功八月十二日陞錦衣衛指揮同知成化二年

正月征勦荆襄反賊劉千斤等當先斬首有功成化

三年九月十三日陞指揮使遇蒙成化二十三年九

月初六日詔書恩與實授指揮使本年十一月內具

本陳情蒙兵部覆奏本月二十六日節該奉 聖旨

楊銘既有虜廷隨侍功勞職事不動欽此弘治四年

三月內具本陳情奏討加陞并世襲于本月二十三



日奉 聖旨該部看了來說續蒙兵部覆奏奉 聖旨楊銘既父子出使并隨侍 皇祖及節次殺賊有功比與其他傳陞的不同准世襲指揮使欽此

廣信府同知鄒 潘


推官方 重校正

臨江府推官袁長馭校正

上饒縣學教諭余學申對讀

湖州府後學吳仕日覆訂

紀錄彙編卷之十九終



北 征 事 蹟

袁 彬 撰

本館叢書集成初編所選

紀錄彙編借月山房彙鈔

及澤古齋重鈔皆收有此

書紀錄在先故據以影印

紀錄彙編卷之十八

北征事蹟

尹直

錦衣衛掌衛事都指揮僉事臣袁彬謹題爲纂修

事成化元年七月二十一日該太保會昌侯孫繼宗等題英宗皇帝車駕北征往還事蹟有錦衣衛都指揮僉事袁彬一向隨侍必能詳知合無令其開寫具題奉聖旨是欽此欽遵本月二十二日臣將事蹟錄寫欲送該館未敢擅便具題奉聖旨是錄寫完了還封進欽此欽遵今將事蹟開坐謹題請旨

計開

正統十四年八月十五日臣在土木爲回回賽伏刺

所虜十六日 皇上在雷家站高崗地上衆坐達子

圍着是臣遠觀認的是我 英宗皇帝臣叩頭哭

上問你是甚麼人臣說是校尉當奉 聖旨你不要

說是校尉只說是原在家跟隨的指揮又問你會寫

字不會臣說會寫就令在左右隨侍答應本日奉

聖旨討珠珠六托九龍段子蟒龍金二百兩銀四百

兩賞也先着臣寫書與千戶梁貴回京奏討十七日

隨到宣府西城角舍荅話城上放短鎗不得近又轉

列南門有 聖旨宣楊洪范廣朱謙羅亨信着開門  
接我城上去城上人回說今日晚不敢開門這城池  
軍馬是 爺爺的楊洪也出去了不在城裏星月上  
時隨 上渡宣府河臣下水控馬渡訖至二更時大  
雷雨就陣上震死也先所騎青白駙馬雨止 上令  
臣出帳房外窺視但見赤光罩定 御帳隨卽奏知  
先是虜衆累謀欲害 上數見瑞應謀遂沮明日也  
先就來帳房前叩頭致敬十八日 聖旨差許寧回  
京奏討賞賜十九日早也先令伯顏帖木得知院來  
進熟肉鋪蓋皮襖二十日到大同東塘坡上 聖

旨着寫書差力士張林到大同城裏有總兵官劉安都督郭登都御史沈固將張林付斷事司審問來歷是晚說差人出來荅話二十一日早過西門荅話

上又令忠勇伯到城下城中不信着臣自騎馬到城下跪說我是寫字的校尉見有駕牌爲照我原籍是江西人這裏委的是 皇帝在土木時軍馬盡被也先殺散了下弔橋放我進去臣入城見劉安郭登沈固霍瑄衆官計議良久留臣在城劉安出城見 上慟哭 上問城裏有會說話的通事着 一人出來劉安說有通事指揮李讓奉 聖旨便着他出來劉安



入城方遣臣出臣見 上又令臣入城取李指揮李

指揮說我女兒許與大同王對親如今不與他我若

出去他定殺了我臣扯住繫腰說 皇帝在門外你

如何不去劉安又言我在 上前說過了你便去遂

同李指揮出見 上得知院等言說我太師也先曾

說我有甚麼本事征伐南朝只是天着我和皇帝一

會李指揮說官人你這說話有天理得知院等到城

下令臣於 上前索羊酒賞賜是日劉安等同大小

官員出城朝見及進羊酒等物 上問大同有多少

錢糧劉安說有十四萬兩銀子當令臣取銀一萬兩

以五千兩賞也先五千兩賞得知院等三人虜衆軍  
馬賞賜 上令臣再入城取銀五千兩散與衆達子  
二十二日臣傳奉 聖旨討武進伯朱寘西寧侯宋  
瑛內官郭敬的家財及三人的蟒龍衣服酒器盡都  
拏來賞與也先城內衆指揮千百戶轆衣服綵段來  
賞與也先大小頭目又着擺筵席管待他至晚離城  
西二十里駐蹕有夜不收楊總旗來與臣說今夜有  
五箇夜不收來密請 爺爺石佛寺去待他尋不見  
時便乘間入城去臣備奏知 上曰此危事使不得  
先在土木時不曾死我命在 天若萬一不虞如何

好遂不用其計二十三日也先等說我每到貓兒莊  
外會議擬送 皇帝南歸是日晚到水盡頭指揮盛  
廣等送至銀三千兩二十四日送衣服二十六日送  
彩段羊酒蜜食二十七日到九十九箇海子二十八  
日下柈源縣二十九日到黑河三十日到八寶山九  
月十六日季鐸齋賞并 聖母皇太后寄來貂裘胡  
帽衣服等物到營見 上說初六日邸王已卽皇帝  
位又說文武百官奉 皇子三人中年長者一人爲  
東宮 皇上令 臣寫書三封一禪位於 邸王一問  
安於 太后一致意於百官絕也先闡地之心動

景皇天倫之念 上看之甚喜當時祝 天本月十七日到斷頭山住五日也先每日進諸般熟野味二十三日又往北行二日也先會議復往南行一日也先號令着廝殺馬五更時分起營至暮駐紮二十八日到大同 上至北門下郭登等朝服在月門裏設交床一把俟候叩頭 上不肯下馬郭登潛令人伏城上欲放下月城闌板虜覺之就擁 上出門也先到大同東門叫城中頭目出見城中不從惟進羊酒諸物 上親說與城上官軍這廝每說謊不肯送我你每守 祖宗的城池操練軍馬不可怠慢十月初

一日至衆樂店內官喜寧說與今送 爺爺從居庸  
關進去初三日至陽和討了牛羊酒初四日到紫荆  
關北空地駐扎有通事都指揮岳謙與臣說喜寧會  
說達達話說他領哨馬進紫荆關去搶北京臣思喜  
寧頗知中國虛實虜用恐其乘虛入關當以岳謙所  
說奏聞 上曰只憑着天理去初五日喜寧領前哨  
進紫荆關北口初九日喜寧等燒燬紫荆關殺都御  
史孫祥初十日過易州至良鄉縣本縣里老人等進  
茶食果品羊酒十一日到蘆溝橋有果園署官以果  
品來進 上又令臣寫書三封奉 聖母皇太后及

御弟皇帝暨文武羣臣通報虜情固守 社稷當

差岳謙同那哈出到彰義門答話岳謙爲官軍殺了那哈出奔走回營與也仙說他南朝人也不認得殺了岳謙也先聽得當令達子擺一字陣直至西直門

上御德勝門外空房內十二日臣送 上登土城

答話有王復趙榮來進羊酒得知院等說怎麼沒大

頭目來接着你小官人出來十五日 上令臣與得

知院說哈銘會說達子話就帶回去不要放他入城

又宣喜寧三次不至是日回至良鄉十六日到易州

十七日到紫荆關連日雨雪上下艱難十八日到渾

河十九日到蔚州二十一日到順聖川駐扎二十三  
日往陽和後口到貓兒莊二十四日北行十一月十  
六日到老營得知院妻宰羊迎 上遞畢十七日宰

馬做筵席在蘇武廟駐扎凡四十日時天寒甚臣得  
宿寢傍每至中夜令臣伏臥內以兩脇溫 上足

上時出帳房仰視天象或指示臣曰 天意有在我

終當歸耳也先每二日進羊一隻七日進牛一隻五

日七日十日做筵席一次逐日進牛乳馬乳又進窩

兒帳房一頂差達婦管起管下 上在行營或坐暖

車或乘馬途中達子達婦遇見皆於馬上叩頭隨路

進野味并奶子也先每宰馬設宴仙奉 上酒就自

彈虎撥思兒唱曲衆達子齊聲和之得知院大同王

賽罕王跪奉 上酒至十二月初二三在老營起往

來駐扎也先并達子每夜見 上所御帳房上火起

隱隱若黃龍交騰其上也先欲以妹進 上竟却之

初六日喜寧與也先議請 上往高橋兒寧夏去臣

說如今天氣冷凍 爺爺如何去得遂不成行喜寧

與也先說都是校尉袁彬撥置阻住將臣賺去蘆葦

地內網了欲開剝忠勇伯密令人走報 上令哈銘

與也先說饒臣死方解皮條放了也先等領達賊四



散捨虜至月盡回營日期不等 上累令 臣寫書差

人回京與 御弟皇帝并文武羣臣以 祖宗社稷

爲重好生操練馬軍謹守城池不要顧我景泰元年

正月初一日 上自將白紙寫表宰羊一隻祝告

天地行十六拜禮至二月初一日也先請 上至其

帳奉酒彈唱也先三妻皆出叩頭獻鐵脚皮四月二

十二日 上以久無使臣往來喜寧又潛懷二意數

教也先擾邊於是令 臣寫分豁本差人回京若爲喜

寧申理者又令 臣至也先處說 爺爺有旨要差總

旗高登太監喜寧達子那哈出回京也先依聽又密

書喜寧謀叛情跡函於木片內繫高鑿腿上令至宣  
府與總兵等官以計擒之及至野狐嶺高鑿與喜寧  
飯於城下密約城上至進湯時卽發短鎗少頃短鎗  
發達衆走散高鑿抱喜寧滾下濠中遂擒入城那哈  
出走回營見 上說喜寧在野狐嶺被高鑿抱住滾  
下濠裏縛入城內去了 上大喜說使兩下裏動干  
戈害人民都是這廝如今拏了他邊上方得寧靖我  
南歸也可望了五月內李實羅綺馬顯齋賞來與也  
先見會議上本月內回京七月初三日哈銘來說也先  
會送 爺爺回朝要京裏着頭目來接就差哈  
銘詣京奏報二十七日哈銘同楊善至龍門地方接

見八月初二日也先得知院等進馬匹貂鼠皮張也  
先得知院等及其妻妾俱送 上行約半日程也先  
下馬叩頭跪着解所帶弓箭撒袋戰裙以進與衆達  
子羅拜伏地慟哭辭去惟得知院領部下人馬直送  
至野狐嶺又進馬匹齊叩頭拜別到宣府右衛城外  
官廳住一夜宣府都督朱謙同男朱勇帶領人馬到  
右衛接見 上到宣府城外搭殿住二月十三日就  
着朱謙設宴討絲段衣服等件賞達子那哈出等又  
有商輅王謙許彬接到朝見畢後 上令臣宣許彬  
等到 上說爲我家 祖宗社稷着恁官人每多費

心憂念我如今幸得回還到京時情願退居閒處你  
便寫書與御弟皇帝知道十四日到雙泉鋪已夜  
其夜上打點衣服以舊所服白綾中衣一件及也  
先所獻戰裙賜臣十五日至京入南宮十六日  
早臣朝見二十五日蒙陞臣試百戶天順元年正月  
十七日上復位十九日陞臣指揮僉事二十五日  
欽賜第一所於澄清坊舊北向上令內官監改  
造面陽本衛役夫千人又賜銀三百兩綵段六表裏  
三月內臣娶妻上命國舅孫顯宗主親及賜金三  
十兩銀二百兩綵幣八表裏天順二年二月內臣生

子賞金二十兩銀一百兩綵幣六表裏又陸續賜大紅織金紵絲蟒龍并各色織金胸背衣服綉春刀磁器等物

右題本臣在史館時已備載諸實錄頗加損益潤色之及此又蒙袁錦衣出示乃復具錄垂後予以昭我英皇之神功聖德感化醜虜而袁錦衣之攄忠效勞始終遭際皆曠古所未有信乎天意之有在而非人力所可及也

臣尹直謹識

廣信府同知鄒潘

推官方重校正

臨江府推官袁長馭校正  
上饒縣學教諭余學申對讀  
湖州府後學吳仕旦覆訂



正統北狩事蹟

撰人 不詳

正統北狩事蹟

本館據紀錄彙編  
本影印初編各叢  
書僅有此本



紀錄彙編卷之二十

正統北狩事蹟

楊銘初名哈銘正統中與其父隨指揮吳良同使瓦刺也先一日集眾使言曰中國留我使臣減我賞賜

絕我和買  
吾興師往

問之因羈留諸使分諸愛馬愛馬華言部落也

吳俊獨亾去因械諸使足八月也先忽來言曰大明天子來矣當親見若等苦楚不復罪汝我將遣使與若等同奉駕歸命弛諸使械乃往見駕時紀信李虎袁彬侍上問來者爲誰曰先遣使臣老哈父

子也時伯顏帖木兒已移營而東銘父子不得留

上曰他日再來見我他日父子復市羊麩以進 上

曰老哈回矣銘可隨侍我於是銘始日侍左右初

駕至大同還師也先來襲至宣府伯顏帖木兒請爲

前哨至雞鳴山遇我師陽奔我師逐之帖木兒報也

先曰急來會師駕在此也先分兵圍我師敗之至土

木也先追至 上遣火吉馬亮與講好也先亦遣使

來赴未至而我營動遂殺火吉以去蹂我師我師大

亂 上乃下馬膝蟠面南坐有一虜衣剝甲不與將不利

其兄來曰此非凡人舉動自別乃以見也先之弟賽

刊王 上問曰子其也先乎其伯顏帖木兒乎賽刊  
王乎大同王乎聞其語大驚去見也先曰部下獲一人甚  
異得非大明天子乎也先乃召先使中國二人問是  
否上呼二人名二人驚曰是也也先乃曰我常祝天  
求大元一統天下今 大明天子乃落我手問衆何  
以爲計其中一胡名乃公大言曰 大明天子大元  
之仇今天以賜我不如殺之伯顏帖木兒大怒呼也  
先爲那顏那顏華言大人也安用此犬輩在旁開口  
推其面曰去那顏只欲萬世美名 大明天子雲端  
裏坐不知上天何故推下之萬衆死傷之中鏃矢不

沾寸兵不染吾知天意之有在也且我等嘗受其賜九龍蟒龍猶在安得害之當報中國遣使來迎送還之一日復坐寶位之上豈不有萬世美名乎衆皆曰者也先乃以 上付伯顏帖木兒令護之帖木兒曰我當奉侍時回子撒夫刺以袁彬來見 上問爲誰曰識字校尉袁彬 上曰虜所怒者校尉勿云校尉只稱識字人已而將至宣府也先命袁彬呼城總兵太監俱不應欲發火鎗乃至大同又令彬呼城總兵廣寧伯等遣人下城視知爲 駕也乃來朝見出大同庫金帛分也先及其下移營而北乃遣使同太監喜

寧赴京奏中國遣都指揮岳謙同寧來賜因言中國  
將立郟王爲帝十月也先殺馬大宴復立 上爲天  
子行賀禮將奉還京至大同東門無出迎者至陽和  
城驛守備齎羊酒米麩來進時也先將從紫荆關入  
命其下無虜掠不能禁銘侍不離左右山路險惡鼻  
血交流比至關夜宿空山中至四更 上呼銘召喜  
寧議事至明日始得見曰未也候下營時議之易州  
百姓進果 上命賜帖木兒時有傳中國事情者又  
命召喜寧岳謙曰有家難奔有國難逃投至涿州官  
吏進羊酒 上以賜也先園官進果品又命賜也先

乃與喜寧計遣吳良梁貴奉勅入城張官保不得往怒乃遣岳謙往至彰義門俱被殺季鐸逃還又遣指揮吳良入城適獲內使阮曠欲遣一人同入城無應者銘請行不然吾父可也先奉 駕至德勝門之土城 景帝陞吳良等官以鴻臚卿趙榮來見 上問何不遣大臣來也先因問此何等官 上曰都是小臣也先曰大臣如何不來迎犬猶認主人我奉 駕至城門不來接 上命諸人回令大臣來見大師趙榮等還也先怒卽奉 駕北去是夕 駕宿猪房喜寧隨也先去袁彬哭曰我母在城不得一見奈何又

命銘召喜寧議事寧與伯顏帖木兒見言曰太師奉  
駕至城門爾弟稱帝不顧臣宰忘恩不來認不來

接因言太師言陽和城當自居庸關入願寬心勿憂  
也至陽和其下虜掠寧言於也先之弟曰太師欲奉  
駕自居庸關入今下人虜掠如此如何可入忠勇  
伯曰此中送去是輕天子也須待中國使臣來迎乃  
可益往西北至小黃河伯顏帖木兒之妻阿撻刺阿  
哈急令使女設帳迎 駕進膳李鐸喜寧自中國使  
臣衣物伯顏帖木兒家人奪分之 上命與帖木兒  
妻索之銘言不可虎口中奪食也縱得之非已有

上怒撻銘後帖木兒妻知之盡追以獻喜寧知之復取去 上曰哈回子言是非已有也 上嘗命銘致意令帖木兒送還朝妻曰我女人何能爲雖然官人盥濯我持侍巾帨亦當進一言伯顏帖木兒嘗因獵得一雉并酒一瓶來獻因銘奏一比喻曰大海水潮時有一大魚隨潮落在淺水灘彼大海中魚如何淺水中住得這大魚急還歸大海中潮水不到如何去得一旦時到潮水接着淺水這大魚還歸大海也 上可寬心時至自不能留憂或成疾悔無及矣銘屢至大同往復勞甚一旦 上謂曰汝知乎昨夜汝以



一手壓我胸我不動俟汝醒乃下其手因言光武與子陵共臥事曰汝今日與子陵一般銘叩頭 上曰回朝着你做都指揮也先一日自至帳殿前曰日出處至日落處皆 皇帝臣子然不得其濟只得哈十一人之力你饑飽冷暖非銘言何由知我兩人坐你看着我我看着你總不知道我有一譬喻銘可將聞於上一朝天子爲百姓與惡人相爭落在惡人之手本國止有一人與他爲伴一日天意回復還本國復登寶位把這一人忘了也不尋他也不舉用他一日早朝百官皆會這人於衆中舉其一指皇帝金臺上

看見問是誰其人曰彼時只我一人也 皇帝他日  
回朝勿忘銘今日之功 詔說太師言是我不忘也  
又往西北行值 聖節也先來上壽進蟒衣貂裘筵  
席議索朝使來迎 上曰不必索使徑去可也喜寧  
曰此袁彬計欲殺之營救乃免遣計安蘇斌入京至  
宣府被殺西行牛頭山又至八寶山大青山喜寧說  
也先奉駕至甘州命劉馬太監毛都督來迎奪了陝  
西徑去南京 上曰到彼亦不來迎喜寧曰此銘之  
計也又欲殺之時伯顏帖木兒往寇寧夏高橋正月  
元日 上上表祝天也先迎於斷頭山作年二月至

東勝州上欲遣喜寧入京曰使臣往往不達須煩一行寧初難之上親至伯顏帖木兒帳令轉達也先帖木兒爲言於也先乃與高旺同行銘言旺曰此事多出喜寧至邊好爲之計寧宿上帳中時微雨上謂銘曰汝知乎此洗屍雨也寧果被邊人執殺之北京逃奴還上曰果然洗屍雨也寧旣死銘言始得用三月大同報有石總兵巡邊也先遣賽刑王將兵三千往哨曰待草青我奉駕至大同彼來迎乃已不然圍之大同勿令縱去及石亨從鴈門入賽刑王追之不及也先怒欲以軍法從事衆皆乞乃已四月伯顏帖木

兒之妻令女使問銘曰今天向煖汝帳中燃火何爲  
銘曰無也妻曰吾見帳上火光是天子之氣光現也  
五月駐金山時伯顏帖木兒與也先駐下水海子怒  
守墩人擾欲殺之銘曰今欲和好而殺其人中國不  
信乃齎勅諭諸墩銘以夜不收王智見智言曰中國  
不知駕在雖云在亦不信若奉駕至大同令總兵等  
官見之乃信伯顏帖木兒奉駕至大同大同守將設  
詐奪駕覺之而去怒銘欲殺之銘言實不知乃免上  
欲遣使入京求使臣來迎銘自請行時也先於九十九  
海子放鷹銘與伯顏帖木兒同往見之也先曰事當如何

帖木兒與阿剌知院言亦欲遣使與銘同往銘言中國萬萬入貢所遣得人成那顏萬世之名不得人壞那顏之名乃遣哈談等二人曰是嘗招安兀卽哈三衛者也至居庸關人疑欲殺之時脫脫不花王使臣亦來貢朝遣通事馬政迎之乃得同赴京七月詔進鎮撫遣楊善趙榮來迎時尚書王直胡濙送至甕城謂銘曰楊公非和番者 朝廷以汝言故遣往其事俱付與汝汝其慎之行至懷來適遇都御史李實使還實言虜求索無厭其情難測 朝廷又遣中使密詔楊善趙榮款宴虜使訶其情偽銘言也先真意講

和奉 駕還朝意不在金帛榮等覆奏銘先報往至大同總兵郭登謂銘 朝廷遣使迎 駕甚善他日果還大同路阻牛羊士馬竭乏駕若從大同入護衛寡少館待不豐非所以示中國之盛不如從宣府入爲便至甘河牛心山大同王喜甚使報也先曰哈銘來矣問所遣使臣爲誰曰是末樂年間大臣宰一爲鴻臚掌天下朝貢之禮銘又言今使臣俱在大同那顏誠心奉 駕彼則來迎如那顏意在金帛彼不來迎也先言我意只欲奉 駕不在金帛遂與刻日爲期又言 上爲汝去憂思成疾可急往見 上問使

臣爲誰曰楊善王息脫脫不花王處則趙榮湯胤勳

上曰楊善王息舊人也甚喜銘以郭登言奏上

然之及楊善等至也先甚喜以禮待之期以八月八

日送駕上語也先欲從宣府入也先言我誠心

奉駕惟上所欲行我亦遣使大臣來送至初八

日也先會諸部殺牛馬作筵請駕動作樂吹唱與

其妻及衆頭目以次進酒進鞍馬弓箭貂裘行一里

也先弟賽刊王亦來送行進酒行禮伯顏帖木兒自

備鞍馬弓箭貂裘亦來送行初九日至野狐嶺遣銘

夜呼萬全城聖旨社稷爲重虜情叵測總兵等官

不必出迎只齋羊酒來勞虜使城上皆呼萬歲伯顏  
帖木兒送至野狐嶺帳中進酒畢命其下出令銘奏  
云當 上將衆行邊以爲天下看邊城偶失身於我  
太師我太師順天意不敢少慢令我侍奉一年皇天  
悔禍 皇帝復回皇弟已立爲帝然位是你所有此  
還還要坐此位他時卽我主也此中有事便投托時  
虜人多進馬楊善促曰 上位行矣 上曰虜人方  
跪獻馬如何行得至野狐口 上令銘勞謝伯顏帖  
木兒曰我去矣帖木兒聞知大哭曰 皇帝去矣何  
時得復相見帖木兒旣去行數里聞人馬聲 上驚



問爲誰乃帖木兒歸逐得野獸使人來獻也至宣府少監郭敏進膳上命以其餒勞虜使總兵朱謙都指揮董斌班賜夷人命銘選虜進馬爲三色五九馬進太后四九奉景帝三九與東宮復以二馬賜張四至雞鳴山太監夏時爲帳殿迎駕內臣見者皆大哭至懷來亦爲帳殿叅將楊信統兵來見至居庸關上御史王洪來見十五日至唐家嶺學士商輅等見又賜輅等馬各一命內使以寢褥靴賜哈銘傳與子孫作古記至德勝門土城總兵石亨張四楊洪少保于謙朝見宣張四馬上同語至安定開甕城

易袍服命銘至東華門外光祿寺一帶列入馬銘奏  
去不得朝中甚嚴 上曰旣去不得罷至安東門外  
而別後有 旨哈銘陞一級授鎮撫袁彬試百戶天  
順元年 上復辟進錦衣衛指揮僉事後殺曹欽有  
功進指揮同知討劉千斤當先進指揮使

廣信府同知鄒 潘

推官方 重校正

臨江府推官袁長馭校正

上饒縣學教諭余學申對讀

紀錄彙編卷之二十終

湖州府後學吳仕日覆訂